

MENJAGA BATAS PERGAULAN

الْحَمْدُ لِلَّهِ الَّذِي أَرْسَلَ رَسُولَهُ بِالْهُدَىٰ وَدِينِ الْحَقِّ لِيُظْهِرَهُ عَلَى الدِّينِ
كُلِّهِ وَلَوْ كَرِهَ الْمُشْرِكُونَ،

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا
عَبْدَهُ وَرَسُولَهُ، اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ
وَأَصْحَابِهِ وَمَنْ تَبِعَهُمْ بِإِحْسَانٍ إِلَى يَوْمِ الدِّينِ.
أَمَّا بَعْدُ،

فِيَا عِبَادَ اللَّهِ، اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا وَأَنْتُمْ مُسْلِمُونَ.

Marilah kita bersama-sama meningkatkan ketakwaan kepada Allah Subhanahu wa-Taala dengan melaksanakan segala perintah dan meninggalkan segala larangan-Nya. Mudah-mudahan kita diberkati dan diredai Allah Subhanahu wa-Taala di dunia dan akhirat.

Sidang Jumaat Yang Dirahmati Allah Subhanahu wa-Taala

Ajaran Islam amat mengambil berat tentang batas pergaulan sesama manusia. Pergaulan itu ada dua jenis, iaitu pergaulan antara sesama lelaki atau sesama perempuan dan kedua pergaulan antara lelaki dengan perempuan. Pergaulan atau percampuran antara lelaki dan perempuan tanpa batasan dilihat sebagai sesuatu yang besar kesannya kepada keruntuhan moral ummah. Sering kita dengar istilah kawan, adik, kakak, abang angkat

juga yang mendakwa sebagai rakan sebang di alam maya atau apa jua istilah yang digunakan merujuk kepada hubungan sosial yang sebahagiannya menjurus kepada perbuatan mungkar. Syariat Islam tidak melarang pergaulan antara lelaki dan wanita asalkan mengikut lunas dan prinsip-prinsip yang ditetapkan oleh syarak. Malah Islam menggalakkan pergaulan yang sihat dan membuahakan manfaat kepada mereka. Dalam Islam pergaulan yang sihat mengambil kira batas-batas mahram dan juga jenis aktiviti yang dijalankan.

Islam mensyaratkan bahawa setiap pertemuan atau pergaulan yang dilakukan antara lelaki dengan perempuan, mestilah disebabkan keperluan yang dibenarkan oleh syarak, bersama mahram, menjaga batas-batas aurat dan percakapan. Sabda Rasulullah Sallallahu Alaihi Wasallam dalam hadis yang diriwayatkan oleh Imam Ahmad;

لَا يَخْلُونَ رَجُلٌ بِامْرَأَةٍ إِلَّا كَانَ الشَّيْطَانُ ثَالِثَهُمَا

Yang bermaksud: *“Tidaklah berdua-duaan seseorang lelaki dengan seseorang perempuan, melainkan syaitan adalah yang ketiganya”*.

Sidang Jumaat Yang Dirahmati Allah Subhanahu wa-Taala

Bagi tujuan memelihara batas-batas pergaulan juga Allah Subhanahu wa-Taala menyuruh lelaki dan perempuan agar menundukkan pandangan apabila bertemu melalui firman-Nya dalam surah al-Nur ayat 30 dan 31:

أَعُوذُ بِاللَّهِ مِنَ الشَّيْطَانِ الرَّجِيمِ

قُلْ لِلْمُؤْمِنِينَ يَغُضُّوا مِنْ أَبْصَارِهِمْ وَيَحْفَظُوا فُرُوجَهُمْ ذَلِكَ أَزْكَى لَهُمْ إِنَّ اللَّهَ
 خَيْرٌ بِمَا يَصْنَعُونَ ﴿٣٠﴾ وَقُلْ لِلْمُؤْمِنَاتِ يَغْضُضْنَ مِنْ أَبْصَارِهِنَّ وَيَحْفَظْنَ فُرُوجَهُنَّ
 وَلَا يُبْدِينَ زِينَتَهُنَّ إِلَّا مَا ظَهَرَ مِنْهَا

Yang bermaksud: “Katakanlah kepada orang lelaki yang beriman supaya mereka menahan pandangan mereka dan memelihara kehormatan mereka (daripada perkara yang haram). Demikian itu lebih suci (lebih baik) bagi mereka; Sesungguhnya Allah amat mendalam pengetahuan-Nya tentang apa yang mereka kerjakan. Dan katakanlah kepada wanita-wanita yang beriman supaya menahan pandangan mereka dan memelihara kehormatan mereka (daripada perkara yang haram) dan janganlah mereka memperlihatkan perhiasan tubuh mereka kecuali yang zahir daripadanya (wajah dan kedua-dua tapak tangan)...”.

Sidang Jumaat Yang Dirahmati Allah Subhanahu wa-Taala

Sangat menyedihkan apabila ada sebahagian ibu bapa yang membiarkan anak-anak tidak menutup aurat dengan sempurna. Sedangkan menutup aurat adalah perintah Allah Subhanahu wa-Taala dan hukumnya adalah wajib.

Usaha bersepadu perlu dilakukan agar masyarakat kita kembali menghayati dan mempraktikkan akhlak yang mulia dalam kehidupan seharian mereka. Sesungguhnya perkara yang wajib bagi kita ialah bersama-sama saling bantu membantu antara satu sama lain atas dasar kebajikan dan taqwa. Firman Allah Subhanahu wa-Taala dalam surah al-Maidah ayat 2:

...وَتَعَاوَنُوا عَلَى الْبِرِّ وَالتَّقْوَىٰ وَلَا تَعَاوَنُوا عَلَى الْإِثْمِ وَالْعُدْوَانِ...

Yang bermaksud: "...Dan hendaklah kamu bantu-membantu untuk membuat kebajikan dan bertaqwa, dan janganlah kamu bantu-membantu pada melakukan dosa (maksiat) dan pencerobohan".

Sidang Jumaat Yang Dirahmati Allah Subhanahu wa-Taala

Khatib menyeru semua umat Islam di segenap lapisan masyarakat hendaklah sentiasa mematuhi hukum dan batas-batas pergaulan berpandukan al-Quran dan al-Sunnah serta menjauhilah pengaruh liberalisma dan pluralisma yang disebarkan oleh orang bukan Islam seperti menyamaratakan kedudukan agama Islam dengan agama-agama lain sehingga ada antara orang Islam tidak berani menyatakan kebenaran agama Islam kerana hendak menjaga hati orang bukan Islam. Sabda Rasulullah Sallallahu Alaihi Wasallam dalam hadis riwayat Imam al-Bukhari:

الإِسْلَامُ يُعْلَوُ وَلَا يُغْلَى

Yang bermaksud: Islam itu tinggi dan tiada yang lebih tinggi daripadanya.

Renugilah firman Allah Subhanahu wa-Taala dalam surah ali-Imran ayat 85:

أَعُوذُ بِاللَّهِ مِنَ الشَّيْطَانِ الرَّجِيمِ

وَمَنْ يَبْتَغِ غَيْرَ الْإِسْلَامِ دِينًا فَلَنْ يُقْبَلَ مِنْهُ وَهُوَ فِي الْآخِرَةِ مِنَ الْخَسِرِينَ ﴿٨٥﴾

Yang bermaksud: *Dan sesiapa yang mencari agama selain agama Islam, maka tidak akan diterima daripadanya, dan ia pada hari akhirat kelak dari orang yang rugi.*

بَارَكَ اللَّهُ لِيْ وَلَكُمْ فِي الْقُرْآنِ الْعَظِيْمِ، وَنَفَعَنِيْ وَإِيَّاكُمْ بِمَا فِيْهِ مِنَ الْآيَاتِ
وَالذِّكْرِ الْحَكِيْمِ، وَتَقَبَّلَ مِنِّيْ وَمِنْكُمْ تِلَاوَتَهُ، إِنَّهُ هُوَ السَّمِيْعُ الْعَلِيْمُ. أَقُولُ
قَوْلِيْ هَذَا وَأَسْتَغْفِرُ اللَّهَ الْعَظِيْمَ لِيْ وَلَكُمْ، وَلِسَائِرِ الْمُسْلِمِيْنَ وَالْمُسْلِمَاتِ،
وَالْمُؤْمِنِيْنَ وَالْمُؤْمِنَاتِ، فَاسْتَغْفِرُوْهُ إِنَّهُ هُوَ الْعَفُوْرُ الرَّحِيْمُ.